

Vangadizza

*** *Luciano Rossi fu Michele* ***

Vetrale, brenta e folaóra

(Cassone per la vendemmia,
tino a tronco di cono rovesciato
e tavolato, fornito di sponde e
con fessure, per la pigiatura)

Poesie

Circolo Noi di Vangadizza

(Cultura - Tempo libero)

www.vangadizza.org

Pro manuscripto

Premessa

La vite e i sistemi di produzione, in particolare in agricoltura, avevano, anno più, anno meno, fino ad un secolo fa, un ritmo legato alle stagioni e ai fenomeni atmosferici. Ora non più .

Lungi da me pormi qui e adesso la domanda se, oggi, l'accantonamento delle usanze e delle tradizioni sia da incoraggiare o da bacchettare .

Io mi limito solo ad osservare che un tempo la vita era diversa .

Forse è il caso che il futuro ne tenga conto.

Auguri, caro, lusinghiero futuro.

Vangadizza, lì 2014

Luciano Rossi

Saluto del Circolo Noi

Ringraziamenti

In ogni poesia è sempre presente la ricerca del bello e del buono delle cose.

Benvenuti perciò i poeti che tentano di mettersi su tale strada.

Un grazie vivissimo al nostro socio Luciano Rossi per la sua disponibilità a comunicare i frutti delle sue intuizioni.

Vangadizza, lì 2014

Il vostro parroco
don Renato Perusi

Presentazione

Accade non di rado di veder citata la frase icastica del musicista Gustav Mahler, secondo il quale *la tradizione non è culto delle ceneri, ma custodia del fuoco*.

Piace sempre ritrovare nei versi di Luciano Rossi un'ampia distanza, quasi asceticamente guadagnata, rispetto all'inutile e pernicioso culto della cenere. Se esiste, infatti, un riflesso salutare derivante dal rispetto della tradizione, non consiste certo in un'adesione ingessata, ma in fondo sterile ad essa. Consiste, invece, in una saggia capacità di attingervi; e per quanto paradossale possa sembrare la cosa, perfino un approccio critico a quanto è tramandato diventa gesto costruttivo di genuina tradizione.

Dice giustamente il nostro poeta, nella premessa ai suoi stessi componimenti, che il futuro dovrà pur tener conto che la vita è cambiata. Se mi è permesso chiosare l'acuta osservazione, direi che il futuro non è solo il cieco cambiamento, ma anche e, forse, soprattutto l'umana, lucida consapevolezza di tale transizione.

D'una simile coscienza il Rossi ci offre sempre divertenti - a volte persino divertiti - scorci. Con l'ironia, mai col sarcasmo, rompe il fiato all'immotivata giaculatoria secondo cui "globale è bello". Non basta cancellare confini per ottenere d'incanto la pace: nella poesia *Le rajse dela goèra*, il Nostro conclude auspicando una guerra che l'uomo dichiara finalmente a se stesso. Non combattuta con cannoni e aviazione, ma - se non intendo male - con le armi del pensiero vigile, che rileva e denuncia prontamente i fragili motivi per cui di sovente ci poniamo in conflitto con i nostri simili.

Sappiamo tutti bene che esiste il vino da meditazione. Raddoppiando la metafora, si può senz'altro dire che i versi del Rossi sono vino da meditazione: non resta che sorseggiare *on gòto de poesia*.

Don Valentino

No' se ragiona

La vol parlarte a tuti i costi ,
la te zerca anca se ti no' te voli ,
te te scondi e la te cata instesso .
ma se pole
nare d'acordo con 'sta persona ?
L'ho sempre dito mi
che co' la morte no' se ragiona .

4 ottobre 2013

Cambiamenti

“ Ti in paradiso
te riconosserò subito “-
g'ho fato capire a on vecio
senza gambe, in carozina .
“ Te te sbagli - el ma dito ,
alzandose in piè belo drito -
Là sarò cosita ! “ .

7 agosto 2013

Corajo !

L'avea ciapà el vizio on poeta
de scrivare le so poesie
su le schedine del totocalcio
e de metarle dopo da 'na parte
in pacheti da zinquanta e da zento .
Quando l'è morto ,
no' essendo più bone
par essere zugà ,
i j'ha butà via tute quante .
Su l'unica che s'ha salvà ,
portà via dal vento, gh'era scritto :
“ Prima de scominzare el viajo
portème a l'ultima ostarìa
dove me son desmentegà
pena e calamaio .
Dante Alighieri, corajo ! “ .

7 agosto 2013

La novità

Nessun posto el me fa più spasmare
da la oja de nare a visitarlo
de restarghe magari on toco
a vivare e sognare .
Visto che no' se pol
fermarse par sempre in nessuna parte ,
un posto, par mi, vale l'altro ,
parché tuti j'è da lassare .
In qualunque posto vao
e dove tuti i dise
che i se cata ben
mi me sento spaesà .
El me posto, g'ho capìo, l'è tra quei
che se sente fora posto
e i speta 'na novità .

31 luglio 2013

Le rajse de la goèra

Tuto el mondo diventà
'na sola nazion .
Finalmente se pol dire
che se pol vivare in pace .
Sbaglio grosso, amizi ,
che no' g'avaria mai credesto .
Da chel momento infati
s'ha messo a nàssare qua e là
de le assicurazion che le punta
a on novo modelo de division .
I so aderenti sparsi in tuto el mondo
basta macare on bóton
e i se raduna dove se vole
vestii da soldà .
E se combatarà ancora .
La goèra allora
no' l'è question de raze
che vol dominare le altre ,
de popoli, de nazion
la goèra l'è 'na question de testa .
L'unica roba allora da fare
l'è che l'omo 'na bona olta
el se decida a dichiarare
goèra a se stesso .

5 agosto 2013

No' sta' tórtela

Semo saludè l'ultima olta
no' tanto tempo fa
e adesso i m'ha dito che l'è zà morto .
Ma sta' tranquilo - i m'ha dito -
ché el saria morto instesso
anca se no'l t'avesse
e no' te l'avessi saludà .
No' l'è che no'se possa morire
senza prima averse saludà .
Se no', sèto
quanto te la tegnaressi longa
diséndoghe che i speta el so turno
i to amìzi par un saludo a ti ? !

1 gennaio 2014

La vita l'è 'na polenta

La vita l'è 'na polenta
che rabaltà'na olta su la panara ,
te la taji a fete e te la magni .
Solo che par gustarla
ghe vorìa calcossa in compagnia
no' digo on piato de bacalà ,
bastarìa 'na feta de salado ,
o de codeghin, 'na s-cianta de panzeta ,
me contentaria
anca de 'na rèscia de scopeton ,
ma gnente, proprio gnente no .
A magnare polenta sola
se ciapa la pelagra
e se more desperà .

7 gennaio 2014

'Na s-cianta de ordine

Ela gnanca 'na roba curiosa ?
Mai che la morte la se daga
na regolada
o almanco 'na regoletta
mai che la faga 'na graduatoria
de ci gh'ha el diritto d'essere el primo
come se fa par esempio ,
o. mejo, se faséa 'na olta ,
coi pensionandi .
A seconta dei ani de laoro ,
de età e de contributi
se savéa ci g'avéa el diritto
de nare in pension
e ci invezze dovéa ancora spetare .
Co' la morte invezze
no' gh'è età né contributi che tegna .
In 'sto campo no' g'hè giustizia ,
mi protesto e digo :
no se podarìa
come s'ha fato con tante altre casse
darghe anca questa , quela de la morte,
al direttore de l'INPS ?
Scometo che el rinunciarìa subito
a la liquidazion
de on milion al mese
e el continueria a restare in servizio
anca senza schèi
e senza nare in pension .

1 gennaio 2014

I miracoli de la poesia

I me sogni. Anca par lori
sta par finire la festa
e me toca métarli tuti
nel calto da in dove
j' avea tirà fora .
Solo qualchedun se ostina ancora
a svolazarme in te la mente
come che la festa
la duresse in eterno .
E inveze sta par rivare el momento
che bisogna métare via
baraca e buratini .
Ma zèrti sogni j'è come i butini ,
i crede nei miracoli
de la poesia .

22 dicembre 2013

L'alegria nei Ricoveri

No' te fe in tempo a fare un'amicizia
che te te la cati bela cambià
e al posto de Toni
oncó vizin al leto
te ghè so cugnà .
El Ricovero el saria anca belo
ma ogni giorno te vedi
che manca uno a tola
e al so posto uno novo .
ch'el te domanda ci te sì .
Porta pazienza ,
doman la sorpresa a lu
te pol fàrghela tì .

12 novembre 2013

L'ultima preocupazion

Un giorno che j'era a l'ospedale
e i me dasèa par perso
un me amigo vegnù a catarme
soto óze el m'ha dito :
“ Se dopo morto te femo un monumento ,
sito contento ? “.
“ Beh ! - g'ho risposto - più che altro
par vegnére a l'inaugurazion “ .

5 dicembre 2013

Le opere de l'omo

Basta 'na barufa
par fermare el petrolio
e no' far più girare in cielo
quei balonzini
che fa nare i telefonini
e el zugo l'è roto ,
uno fra i tanti
da butare in un cantón .
Tuto quello che fa l'omo
el dura el tempo
de 'na ilusion .

17 novembre 2008

La revision

La vita l'è un'automobile
che la deve aver subio
de le gran manomission .
Gh'è si el volante ,
ma ghe manca, par esempio ,
sterzo, freni e retromarcia .
Cosìta, se te cati on stralòsso
no' te pol schivarlo ,
svoltando a destra o a sinistra ,
se te traversa la strada on gato
te s' costreto a investirlo ,
e, se te vol fermarte
a fare marcia indrio ,
gnan sognartela .
L'è dura sempre la stessa andatura
senza un movimento de fantasia
e, finìa la corsa ,
dover lassartela portar via .
Ogni tanto
me vien 'na gran oja de portarla
a farghe fare 'na revision .
Nessun problema - i m'ha dito -
solo che dopo
no' te pol più ritirla .

7 gennaio 2014

Poesie fate co' i piè

No' se usa più fare el vin
folando la ua co' i piè 1)
da quando un secolo fa o piassè ,
i g'ha inventà, pensàndole mejo ,
de le machine speciali
par tale attività .
Gh'è on particolare però
che vien poco cosiderà .
Le machine no' le g'ha on core
e le sbòcia e struca non solo i grani , 2)
ma anca el graspo ,
le fa el mosto, in altre parole ,
anca col legno che i piè
i lassava intato
par essere dopo
butà via come scarto .
Le fa come zèrti poeti de oncó
che i sbòcia non solo le parole ,
ma anca le virgole e i punti ,
e cosita ogni tanto
no se se capisce più .
Anca le poesie calche olta ,
parlo de le mie ,
sarìa mejo farle co' i piè .

16 gennaio 2014

1) folando = pigiando

2) le sbòcia e struca = schiacciano e stringono

Sperando che la se cambia

Uno sóra l'altro impachetè
i calendari con drènto el tempo ,
ognuno col sóo
e gnan 'na s-cianta
de manco o de più .
A goardarli par coànta
atenzion te ghe meti
te je diressi carta
senza valore, straza ,
ma, se te li lèzi ,
te vedi che i sgòza da ogni riga
tante lagreme e sangue
e poca contenteza .
Mi de solito me fermo
solo su qualche data
onomastici, compleani
e recite de poesie .
Mejo no' goardare
quel che è successo nei altri giorni .

31 dicembre 2012

El silenzio

Córe i giorni come sidiói ,
e, quando j'è passè, sconti nei ricordi
i se fa sì ogni tanto védare ,
ma solo par farte sentire
quanto tuto l'è gnente, tempo, schèi ,
gioie, dolori, sogni bruti e bei .
El nostro ciasso ,
par quanto longo e largo
el finisce in pressia e vien la olta
ch'el tase del tuto e par sempre .
Èco, l'è el silenzio che me spaventa ,
no' sentir più gnente .
Catarse da soli
l'è come esser morti .
Ne ocore 'na óze
che rompa el silenzio .

12 marzo 2009

El vero conforto

Tuti i me dise “ Ciàmete contento,
parché ghe n'è messi pèzo de ti “.

Come che par mi
fusse on conforto
oltre a no' èssare
più bon de jutare nessun
no' èssare gnan mi
più aiutà .

L'è sbaglià el proverbio ch'el dise
“ Mal comune mezzo gaudio “.

Par mi el conforto l'è savére
che ghe sia sempre uno che possa
darne 'na man .

Un orbo a mi che che no' ghe vedo ben
no' l'è indicà .

Mejo vérghe vizìn on sior avaro
che on pitoco generoso
e pien de bontà .

29 dicembre 2013

El compito del mas-cio

Gnan da far védare ai buteleti .
E come spiegarghe alora da cossa
vegnea fora i saladi, larghi o streti ,
i codeghini, la panzeta, ciòssa

o mòla, el lardo, le grassiole e l'onto ?.
Un sacrificio senza cativeria .
Par questo el mas-cio nol s'avea mai sconto
e la morte, par schivarla, da seria

la diventava 'na festa par tanti .
Eco el parólo, el mazìn col cortelo ,
la pelaora, el mas-cio quanto zigare !.

Par quanto fredo, se fa senza guanti ,
se ride, un butin ghe domanda al zielo
se par magnare sia giusto copare .

2 dicembre 2013

El vestito

Dove le tegna le done on vestito ,
nero, da luto ,
in caso de necessità ,
l'è sempre sta' par mi on mistero .
Ricami e frónzoli mai visti prima ,
un capèlo che l'è 'na bomba ,
quando mai l'avéla comprà
'na balarina me amica
che l'ho sempre vista portare
vestiti da varietà ?
Quasi quasi vien da pensare
che par le done l'eleganza
la vegna prima de la verità ,
se parfin davanti a la morte
le pensa prima al vestito
e dopo a la realtà .

24 dicembre 2013

La piramide disdetà

Visto che, par quanto
me daga da fare
par la conservazion del me corpo
par la risurezion finale ,
el massimo de concession
l'è zinquantani
e uno de più gnan se te te fè
'na piramide de piera trionfale ,
se dopo no' te ghè parenti
che rinnova el contrato ,
tanto vale che i me buta via
apena scadù el me tempo
de tumulazion .
Se par restare in 'stò mondo
se deve fare la goèra
anca da morti ,
vorà dire che narò via al più presto
e senza rabiarme con nessun .

7 novembre 2013

El problema che più me sta a córe

Come bondòloti de saón , 1)
che pirla e gira senza un programa
e nessuna direzion ,
a olte par ore o giorni
- ma l'è un'ecezion -
e che dopo i finisce tuti ,
s-ciopando qua e là ,
in te 'na desfàntola totale , 2)
in te 'na totale perdizion .

O èlo el nostro vivare invezze
un molare un vestito ,
provvisoriamente imbastìo
con filo scadente ,
par rimétarlo, un giorno, rifato
con stofa nova e cosidure bone
par durare un'eternità ?
Questo el me problema da sempre
e soprattutto da quando
me par de nare in giro
tuto quanto strazà .

25 ottobre 2008

- 1) bondolòti de saón = bolle si sapone)
2) desfàntola = dissoluzione, disfacimento

L'union fa la forza

No' son bon de rassegnarme
de savérlo prigioniero .
Liberarlo come fare ?
A scapar dal cimitero
ci elo ci che ghe la fa ?
No' l'è el caso però, penso ,
de bocciare el tentativo .
Fin da adesso con impegno ,
strolicando sul problema ,
g'ho pensà de bon e de mèjo ,
son rivà a la conclusion :
fare el morto pure mi
e ds drento, assieme a lu ,
scapar fora, dopo, in du .

17 novembre 2008

El Carnevale del vecio

Un buteleto vestio ds Arlecchino
avicinandose a mi el me dise :

“ Ti che mascara sito ? “

Lì par lì son restà interdeto .

Dopo però g'ho risposto :

“ Porto la mascara da butelo “

“ Se l'è vera - el m'ha dito el buteleto -
te la porti male assè .

4 marzo 2014

(ultimo giorno di Carnevale)

Le banche del futuro

Morendo, senza eredi, on me amico
el g'ha dito a ci j'era presente :

“ Ve lasso i me ricordi .

Tegnimeli da conto

par quando ogni tanto

ritornarò a catarli !”.

“ E dove, intanto, li metémo ?”.

soto oze el g'ha risposto uno par tuti ”.

“ Metili in banca

- el g'ha zontà el me amico -

e tegnìve i fruti “.

9 maggio 2014

Piccolo sogno

Prima de morire ,
vorìa védare almanco 'na olta
on fiordaliso .
Tuti i poeti i parla
dei so fiori celesti più del cielo ,
ma in dove l'hai visto ?
Vorìa savérlo
par scrivere 'na poesia anca mi .

19 maggio 2014

La sagra

A dire el rosario stasera
sète persone ,
a goardare chi bala setezento .
El Patrono l'è contento .
Ghe basta èssare ricordà .

9 maggio 2014

INDICE

4	Vetrale, brenta e folaóra
5	No' se ragiona
5	Cambiamenti
6	Corajo !
7	La novità
8	Le rajse de la goèra
9	No' sta' tórtela
10	La vita l'è 'na polenta
11	'Na s-cianta de ordine
12	I miracoli de la poesia
13	L'alegria nei ricoveri
14	L'ultima preocupazion
15	La revision
16	Poesie fate coi piè
17	Sperando che la cambia
18	El silenzio
19	El vero conforto
20	El compito del mas-cio
21	El vestito
22	La piramide disdetà
23	El problema che più me sta a core
24	Le opere de l'omo
24	L'union fa la forza
25	El carnevale del vecio
26	Le banche del futuro
27	Piccolo sogno
27	La sagra